

que se li dis . . Loys estoit reconciliies de nostre saint pere . . le pape comme rois v empereres de Rome et que il fust obediens fils de sainte eglise, nous ne feriens pas tenus a lui seruir ne aidier contre le dit Loys, se ce estoit sur le heritage del empire v dou roiaume de Alemagne; mes ou cas que il seroit reconciliies et obediens fils de sainte eglise, comme dit est, ains que ceste guerre fust finie, dont lui deuerons nous aidier et seruir contre le dit Loys dedens le heritage dou dit mons(ieur) . . le roi de France et le heritage de son fil nostre chier signour mons(ieur) Jehan de France par la ditte grace duc de Normandie, tant que li dis . . rois de France viuera ceste guerre durant, en defendant lui et son dit fil et lor dis heritages en boine foid loialment seins malengien. (2) Et por ce que nous et nos dittes gens puissions et doiens mieus seruir a present le dit . . roi de France en la ditte guerre, il nos a bailliet et deliureit maintenant en deniers apparelliez por les prouenances et le apparel de nous et de nos gens quinze mil lb. de Par(is), des queles nous len auons quitteit entirement. Et si tost que il nos mandera v semonra por entrer en la ditte guerre v por lui servir et aidier, si comme dit est, il nos doit et a promis a bien paiier et deliurer, ains que nous issons de nostre lieu, quinze mil lb. de Par(is) et por nos despens cascun jour cinquante lb. de Torn(ai) et les gages por nos dittes gens tels, que il et si predecesseur ont acoustumeit de paiier et de donner, a sauoir est le double baneret quarante sols, le simple baneret vint sols, le cheualier diz sols et lesquiier chinq sols et tous Torn(ais), les queles cinquante lb. et les dis gages il nos doit enuoier, deliurer et paiier a ses despens en labbeye saint Nicaise de Reins tous jours por un mois auant le temps, tant et si longement de mois en mois, que il nos vorroit auoir en son dit service. (3) Et sil auenoit, que aucun de nous v de nos gens fuissions pris en la ditte guerre, que Dieus destorne, il nos doit et a promis en boine foid loialment de nous acquiter et deliurer a ses propres cous et perils seins nos despens et damages au plus tost que il porra boinement et aussi de restorer et rendre a nous et a nos gens tous nos cheualz darmes, que nous perderiens en la ditte guerre v al occoison de lui, selonc la coustume de France seins malengien; et tout li corps des prisons, que nous et nos dittes gens prenderiens en la ditte guerre, seront le dit . . roi de France sauf lor cheualz, armes et autres biens, que il aueroient sur lor corps, que nous auerons por faire notre plaisir. (4) Et se pais v acors se faisoit de la